

四庫全書

集部

欽定四庫全書

集部
文選顏鮑謝詩評卷
三四

詳校官中書臣陸湘

助教臣常循履勘

謄錄貢生臣邵熙

欽定四庫全書

文選顏鮑謝詩評卷三

元方回撰

行旅

永初三年七月十六日之郡初發都一首

謝靈運

述職期閑暑理棹變金素秋岸澄夕陰火旻團朝露辛
苦誰為情遊子值顏暮愛似莊念昔久敬曾存故如何

懷土心持此謝逵度李牧愧長袖卻克慙躡步良時不見遺醜狀不成惡曰余亦支離依方早有慕生幸休明世親蒙英達顧空班趙氏壁徒乖魏王瓠從來漸二紀始得傍歸路將窮山海迹未絕賞心晤

虛谷曰諸侯朝於天子曰述職然漢書王吉傳云召公述職舍於常下而聽斷則諸侯治事亦曰述職可也靈運本期夏末視郡事而秋乃成行也見似人而喜出莊子久友交而中絕曾子以為三費出韓詩外

傳靈運不勝去國之懷故用此三事以寓念昔存
故之意不但悵然於廬陵義真也李牧臂短為
木杖接手晉郤克跛而登階齊婦人笑之出戰
國策左傳支離疏形體不全孔子遊方之內方
常也依常教也並出莊子靈運用此四事自況於
醜惡疾病之列而亦不敢自畔於禮法猶幸而不
見棄於明時也相如以趙璧為瑕惠子以魏瓠為
無用靈運又用此二事謂英達之顧雖荷義真

出為外郡徐傳見擠珍非趙璧而棄如魏歆也
從來漸二紀始得傍歸路想靈運去會稽始寧
出任踰二十餘年今乃因作郡而過家也將窮
山海迹未絕賞心晤自是佳句然其義專在義
真義真於靈運嘗云未能忘言於悟賞而靈運
終身亦有賞心永絕之歎此詩排比整密建安諸子
混然天成不如此陶淵明剥落枝葉不如此但當以
三謝詩觀之則靈運才高詞富意愴心怛亦未易涯

溪也

過始寧墅一首

謝靈運

束髮懷耿介
逐物遂推遷
違志似如昨
二紀及茲年
緇磷謝清曠
疲忝貞堅拙
疾相依薄暎
得靜者便剖
竹守滄海枉帆
過舊山山行
窮登頓水涉
盡洄沿岩峭
嶺稠疊洲縈
渚連緜白雲
抱幽石綠篠
媚清漣葺宇
臨迴江築觀
基曾巔揮手
告鄉曲三載
期歸旋且為
樹粉櫝

無令孤願言

虛谷曰詩有形有脉以偶句叙事述景形也不必偶而必立論盡意脉也古詩不必與後世律詩不同要當以脉為主如此詩剖竹守滄海以下五聯十句皆偶未為奇也前八句不偶則有味矣東髮懷耿介當是年十五而涉世倏復二紀則三十歲矣沈約宋書靈運全傳內有山居賦注俟考拙與疾相迫而後得遂靜者之志靜者詩家多用本於論語仁者靜但未

詳用靜者二字誰為祖耳此所以述出處本末也期
約鄉曲三載而歸俾樹枌檟無孤始願此繳句又自
有味靈運欲書滿郡考後乃一年移疾去職蓋其家
溫有餘無資於祿惜乎才高氣銳積以不參時政為
恨遂致顛沛云始寧縣今上虞之南鄉恭奴結切

富春渚一首

謝靈運

宵濟漁浦潭旦及富春郭定山緬雲霧赤亭無淹薄朔

流觸驚急臨圻阻參錯亮乏伯昏分險過呂梁壑洊至
宜便習魚山貴止託平生協幽期淪躋困微弱久露干
祿請始果遠遊諾宿心漸申寫萬事俱零落懷抱既昭
曠外物徒龍蠖

虛谷曰靈運歸會稽始寧墅從今漁浦沂富陽赴永
嘉也定山亦亭今如故伯昏呂梁二事以言浙江之
險坎之水洊至習乎險者也艮之魚山貴乎止也久
露干祿請始果遠遊諾謂久有補郡之請今得永嘉

而遂遠遊之願也宿心漸申寫即所謂幽期者無可
乖矣萬事俱零落一句怨辭也志欲與廬陵有所為
雖未必曾有宰相之許而襟期不淺既為徐傳所擠
則從前規度之事俱無復望也其怨深矣龍蠖之屈
以求伸此謂心事明白如爵祿外物聽其可有可無
也細味之靈運實未能忘情於世故如此作以詩法
論之若無平生協幽期以下八句議論前十句鋪叙
而已

七里瀨一首

謝靈運

羈心積秋晨晨積展遊眺孤客傷逝湍徒旅苦奔峭石
淺水潺湲日落山照曜荒林紛沃若哀禽相叫嘯遭物
悼遷斥存期得要妙既秉上皇心豈屑末代諠目覩巖
子瀨想屬任公釣誰謂古今殊異代可同調

虛谷曰文選注桐廬有七里瀨下數里至嚴陵瀨予
作郡七年往來屢矣今人皆混而言之任公之釣志

其大而不志其小故所得者大予謂此寓言非所以
擬嚴子遷斥者推移之義非謂遷謫也

登江中孤嶼一首

謝靈運

江南倦歷覽江北曠周旋懷新道轉迴尋異景不延亂
流趨正絕孤嶼媚中川雲日相輝映空水共澄鮮表靈
物莫賞蘊真誰為傳想像崑山姿緬邈區中緣始信安
期術得盡養生年

虛谷曰此今永嘉郡江心寺無疑予三十年前甲寅
乙卯寓郡齋往遊見徐靈暉流來天際水截斷世間
塵詩牌不見此詩至今永嘉稱為中川者因此詩也
孤嶼媚中川媚字句中眼也懷新道轉迴此句尤佳
心有不純去道愈遠但恐靈運道其所道耳尋異景
不延異字可疑雲日空水之聯亦佳表靈蘊真一聯
似乎深奧然從此說向神仙上去則所謂靈與真者
仙也故於孤嶼之上想夫崑崙山之神而有信於安

期生之術安期瑯琊阜鄉人秦始皇東游與語三日
三夜者西王母者崑崙之神

初去郡一首

謝靈運

彭薛裁知恥貢公未遺榮或可優貪競豈足稱達生伊
予秉微尚拙訥謝浮名廬園當栖巖卑位代躬耕顧已
雖自許心迹猶未并無庸妨周任有疾像長卿畢娶類
尚子薄游似邴生恭承古人意促裝返柴荆牽絲及元

興解龜在景平負心二十載於今廢將迎理棹遄還期
遵渚驚修垵溯溪終水涉登嶺始山行野曠沙岸淨天
高秋月明憩石挹飛泉攀林寥落英戰勝臞者肥止監
流歸停即是義唐化獲我擊壤情

虛谷曰牽絲及元興初仕解龜在景平謂去郢晉安
帝初改隆安至五年而改元元興是年三月桓玄入
京師二年十一月玄篡晉三年二月劉裕起兵四月
玄伏誅明年改元義熙三月安帝還京師自此盡十

四年恭帝改元元熙盡一年明年六月劉裕篡晉改
元熙二年為永初元年盡三年少帝改元景平明年
文帝入改永平二年為元嘉元年自元興之元至景
平之元凡二十三年靈運初以襲康樂公除散騎常
侍不就此牽絲之始也得非桓玄未反之先乎其為
瑯琊王大司馬參軍此則在反正之後無疑中間遷
太子左衛率次沈約宋書細考永初三年秋出為永
嘉太守景平元年秋謝病去職作此詩以彭宣薛廣

德貢禹為不足以周任司馬長卿尚子平邴曼容自
擬刊本妨周任決非妨字非倣字即方字倣像類似
四字一義故也或問予野曠沙岸淨天高秋月明以
筆圈之良是遡溪終水涉登嶺始山行點之則何義
邪曰此於永嘉去郡如畫也永嘉城下汴潮江過青
田縣抵處州始舍舟登馮公嶺出永康東陽非常至
其地不知也文選注戰勝明貴不如義止監明語不
如默所注甚佳戰勝而肥子夏事出韓子莫監流水

而監於止水出文中子擊壤事出莊子論衡周處風
土記

初發石首城一首

謝靈運

白珪尚可磨斯言易為緇雖抱中孚爻猶勞貝錦詩寸
心若不亮微命察如絲日月垂光景成貸遂無茲出宿
薄京畿晨裝搏曾颺重經平生別再與朋知辭故山日
已遠風波豈還時苔苔萬里帆茫茫終何之遊當羅浮

行息必廬霍期越海陵三山遊湘歷九嶷欽聖若旦暮
懷賢亦悽其皎皎明發心不為歲寒欺

虛谷曰中孚貝錦之聯甚佳微命察如絲察字尤佳
老子曰夫惟道善貸與善成貸施也靈運感文帝之
宥已故以日月喻之舊說會稽之浮山合於廣東之
羅山廬山在今江州霍山滯皖是在今舒州三山海
中九嶷湘中靈運方當治郡畧不及理人宣化事專
言游山意太汗漫無歸宿萬世之後一遇大聖知其

解者是旦暮遇之出莊子晉人老莊之學初用為清
談之資而詩亦必出於是一時之蔽也

道路憶山中一首

謝靈運

采菱調易急江南歌不緩楚人心昔絕越客腸今斷斷
絕雖殊念俱為歸慮款存鄉爾思積憶山我憤懣追情
栖息時偃卧任縱誕得性非外求自已為誰纂不怨秋
夕長常苦夏日短濯流激浮湍息陰倚密竿懷故叵新

歡含悲忘春暝悽悽明月吹惻惻廣陵散殷勤訴危柱
慷慨命促管

虛谷曰楚詞有云涉江采菱古樂府有江南辭靈運
時必有此二曲其聲急而怨故引之以見故山之思
有感於此聲也縱誕之說非是得性非外求謂樂在
內是也吹萬不同而使其自己已訓止言各得其性
而止出莊子靈運意謂山水之樂適我之性而自足
自止無人能繼我者纂訓繼則亦深僻矣明月吹言

笛廣陵散言琴靈運當是作此音以寫悲怨危柱促
管謂琴笛之音自緩而急悲怨至此極也詩尾應首
然有哀以思之意未為佳篇

入彭蠡湖口一首

謝靈運

客遊倦水宿風潮難具論洲島驟迴合圻岸屢崩奔乘
月聽哀狄浥露馥芳蓀春晚綠野秀巖高白雲屯千念
集日夜萬感盈朝昏攀崖照石鏡牽葉入松門三江事

多往九派理空存靈物若珍怪異人祕精魂金膏滅明
光水碧綴流溫徒作千里曲絃絕念彌敦

虛谷曰彭蠡湖口今江州湖口也石鏡松門文選注
張僧鑒尋陽記顧野王輿地志各指其地惟三江事
多往九派理空存此二句者知三江九江自晉宋時
已不明矣中江南江北江先儒所辨有尚書索玄在
分九派於尋陽郭璞江賦云耳後人亦不能定九派
之迹劉子澄淳祐江州圖經詳著之子已別書訂此

詩則靈運之所不詳後人姑存疑事也靈物異人以
下又歸宿於仙道千里曲想當時有此琴操徒作此
曲而仙靈不接所以弦雖絕而心徒悲也大抵以恍
惚為宗要為不近人情胸中亦別無十分道理也

入華子崗是麻源第三谷一首

謝靈運

南州實炎德桂樹凌寒山銅陵映碧澗石磴瀉紅泉既
枉隱淪客亦棲肥遁賢險逕無測度天路非術阡遂登

羣峰首邈若升雲煙羽人絕髣髴丹丘徒空筌圖牒復
磨滅碑版誰聞傳莫辨百世後安知千載前且申獨往
意乘月弄潺湲恒充俄頃用豈為古今然

虛谷曰華子期角里弟子見列仙傳故老相傳翔集
此頂故稱華子岡神仙茫昧前後莫測且申獨往意
夫獨往者聊以自充俄頃之賞非為尊古卑今而然
也

一 北使洛一首

顏延年

改服飭徒旅首路跼險艱振楫發吳洲秣馬陵楚山塗
出梁宋郊道由周鄭間前登陽城路日夕望三川在昔
輟期運經始濶聖賢伊穀絕津濟臺館無尺椽宮陛多
巢穴城闕生雲煙王猷升八表嗟行方暮年陰風振涼
野飛雲替窮天臨塗未及引置酒慘無言慙慙徒御悲
威遲良馬煩遊後去芳時歸來屢徂讐遂心既已矣飛
薄殊亦然

虛谷曰文選注沈約宋書曰延之為豫章世子中軍
行參軍義熙十二年高祖北伐有宋公之授府遣一
使慶殊命參起居延之至洛陽道中作詩一首文辭
藻麗為謝晦傅亮所賞集曰時年三十二予味此詩
人所可及所以書此詩者有二東晉五國一百四年
義熙十二年恰一百年足也後四年而劉裕禪洛陽
自惠帝朝喪亂迄于懷愍蒙塵百餘年丘墟延之三
川之詠謂伊瀝絕津濟臺館無尺椽予存此所以考

時論事也義熙十二年延之年三十二元初三年出
為始安太守當年三十八元嘉三年入為中書侍郎
當年四十二元嘉十年有湖北田收詩當年四十九
是年謝靈運誅至元嘉二十六年有京口蒜山後湖
詩則年六十六矣孝武登阼為金紫光祿大夫領湘
東王師則七十餘矣予存此所以考年論人也又因
而論之陶淵明元嘉四年卒年六十三延之為劉柳
後軍功曹在潯陽與淵明情款後為始安郡經過淵

明每往必酣飲致醉臨去留二萬錢與淵明淵明悉
送酒家觀此乃知延之詩雖不及靈運其胸次則過
之靈運嘗入廬山不為逵法師所與亦不聞其見交
於淵明延之獨與淵明交好甚深以年計之永初三
年淵明年五十八矣長延之二十歲亦可謂忘年之
交也延之後作靖節徵士誄書曰有晉徵士雖出於
衆志而延之實秉易名之筆其知淵明蓋深也違衆
迷尤迂風光躡身才非實繁聲有歇延之誄書淵明

所誨如此又書淵明獨立者危至方則礙語其有得
淵明也多矣故曰詩雖不及靈運其宵次則過之

還至梁城作一首

顏延年

眇然軌路長
憔悴征戍勤
昔邁先徂師
今來後歸軍
振策睽東路
傾側不及羣
息徒顧將夕
極望梁陳分
故國多喬木
空城凝寒雲
丘隴填郭郭
銘誌滅無文
木石局幽閨
黍苗延高墳
惟彼雍門子
吁嗟孟嘗君
愚賤同埋

滅尊貴誰獨聞曷為久游客憂念坐自殷

虛谷曰此詩十韻故國多喬木空城凝寒雲丘壑填
郭郭銘誌滅無文木石扃幽閨黍苗延高墳惟彼雍
門子吁嗟孟嘗君愚賤同湮滅尊貴誰獨聞亦通論
也但不可及耳

始安郡還都與張湘州登巴陵城樓作一首

顏延年

江漢分楚望衡巫莫南服三湘淪洞庭七澤謁荆牧經

逌延舊軌登闥訪川陸水國周地險河山信重複却倚
雲夢林前瞻京臺圓清霧霽岳陽曾暉薄瀾澳悽笑自
遠風傷哉千里目萬古陳往還百代勞起伏存沒竟何
人炯介在明淑請從上世人歸來藝桑竹

虛谷曰此詩十韻江漢分楚望荆巫奠南服三湘淪
洞庭七澤藹荆牧起句二韻大槩言地勢郊外曰牧
荆牧言七澤之野也末韻請從上世人歸來藝桑竹
有感於存沒竟何人炯介在明淑而云初不明言炯

介明淑為進為退而為松竹之句則意在退也

還都道中作一首

鮑明遠

昨夜宿南陵今旦入蘆洲客行惜日月崩波不可留侵
星赴早路畢景逐前儔鱗鱗夕雲起獵獵曉風遒騰沙
鬱黃霧翻浪揚白鷗登艫眺淮甸掩泣望荆流絕目盡
平原時見遠煙浮倏悲坐還合俄思甚魚秋未嘗違戶
庭安能千里游誰令乏古節貽此越鄉憂

虛谷曰此詩尾句絕佳守古人之節不輕出仕則焉得有越鄉之憂乎前段皆江路曉行暮宿之意

之宣城出新林浦向版橋一首

謝玄暉

江路西南永歸流東北驚天際識歸舟雲中辨江樹旅思倦搖搖孤游昔已屢既懽懷祿情復協滄洲趣囂塵自茲隔賞心於此遇雖無玄豹姿終隱南山霧

虛谷曰天際識歸舟雲中辨江樹古今絕唱江路西

南永今大江上水指西南行而南為多歸流東北驚
今下水即東北行而北為多之宣城即上水玄暉家
於浙則東北乃其歸路上水用東北風下水用西南
風此二句又似指定江流之勢古今不可易也得郡
而魚得山水之樂於永嘉臨川則靈運於宣城則玄
暉而玄暉至今專謝宣城之名云板橋名今猶存晉
宋時乃浮橋

敬亭山詩一首

謝玄暉

茲山亘百里合沓與雲齊
隱淪既已託靈異居然樓上
干蔽白日下屬帶迴谿
交藤荒且蔓樛枝聳復低
獨鶴方朝唳饑飈此夜啼
淅雲已漫漫多雨亦淒淒
我行雖紆組兼得尋幽蹊
緣源殊未極歸徑窅如迷
要欲追竒趣即此陵丹梯
皇恩竟已矣茲理庶無睽

虛谷曰此詩妙在何處亦本無妙而玄暉詩名與敬亭山千古不朽何也學者試下一轉語

休沐重還道中一首

謝玄暉

薄游第從告思閒願罷歸還邛歌賦似休汝車騎非灞
池不可別伊川難重違汀葭稍靡靡江蓼復依依田鶴
遠相叫沙鵝忽爭飛雲端楚山見林表吳岫微試與征
徒望鄉淚盡霑衣賴此盈樽酌含景望芳菲問我勞何
事霑沐仰清徽志狹輕軒冕恩甚戀重闈歲華春有酒
初服偃郊扉

虛谷曰薄遊於朝本孫綽語謂立朝僅許給假故曰
薄遊第從告漢書五日得一休沐休者假也沐者洗
也願罷歸而僅賜休沐也司馬相如還臨邛諭蜀而
歸也嘗奏賦漢武故玄暉以為似之袁紹以濮陽令
歸汝南不敢以輿服令許子將見單車歸家玄暉無
此車徒故曰非也此二句極佳長安之霸池洛陽之
伊川借喻京師以言戀闕之意楚山吳岫二句亦佳
玄暉家吳中嘗有詩曰再遊館娃宮是也末句謂志

輕軒冕而君恩之至則又有禁闥之戀重聞謂官省也最後句終期退閒其思緩而不迫尤有味也

晚登三山還望京邑一首

謝玄暉

灞涘望長安河陽視京縣白日麗飛甍參差皆可見餘霞散成綺澄江淨如練喧鳥覆春洲雜英滿芳甸去矣方滯淫懷哉罷歡宴佳期悵何許波下如流霞有情知望鄉誰能續不變

虛谷曰起句以長安洛陽擬金陵用王粲潘岳二詩
極佳李白云解道澄江淨如練令人却憶謝玄暉此
一聯尤佳也三山今猶如故回望建康甚近想六朝
時甚盛也味末句其惓惓於京邑如此去國望鄉其
情一也有情無不知望鄉之悲而況去國乎

京路夜發一首

謝玄暉

擾擾整夜裝肅肅戒徂兩曉星正寥落晨光復泱泱猶

霑餘露園稍見朝霞上故鄉邈已夏山川修且廣文奏
方盈前懷人去心賞敕躬每跼蹐瞻恩唯震蕩行矣倦
路長無由稅歸鞅

虛谷曰此乃早行詩兩車也但兩二字甚佳

樂府

會吟行

謝靈運

六引緩清唱三調佇繁音列筵皆靜寂咸共聆會吟會

吟自有初請從文命敷敷績壺冀始刊木至江汜列宿
炳天文負海橫地理連峰競千仞背流各百里瀧池溉
粳稻輕雲暖松杞兩京愧佳麗三都豈能似層臺指中
天高墉積崇雉飛燕躍廣途鷁首戲清沚肆呈窈窕容
路曜便娟子自來彌年代賢達不可紀句踐善廢興越
叟識行止范蠡出江湖梅福入城市東方就旅逸梁鴻
去桑梓牽綴書土風辭殫意未已

虛谷曰文選不注會吟行之義詳考乃是倣陸機吳

越行崔豹古今注曰吳越曲吳人以歌其地也今日
會吟非吳會之會即會稽之會今兩浙秦之會稽郡
漢之吳郡也陸機之作曰楚妃且莫歎齊娥且莫謳
四坐並清聽聽我歌吳越吳越自有始請從昌門起
以下十四韻皆述吳中風土人物靈運之作起句三
韻同調以下少一韻耳鋪叙誇張別無高意皆不可
謂之佳作六引三調文選注亦不詳明所引吳越六
人所謂越叟者出越絕書子胥戰於槁李闔閭軍敗

欲復其讎師事越公錄其術又非范蠡其人他書未
嘗見東方朔就旅逸出劉向列仙傳謂宣帝時棄郎
去避亂政置幘官舍風飄之去後見會稽賣藥漢書
無此事餘四人史可考

樂府詩八首

鮑明遠

東武吟

主人且勿諠賤子歌一言僕本寒鄉士出身蒙漢恩始

隨張校尉占募到河源後逐李輕車追虜窮塞坦密塗
亘萬里寧歲猶七奔肌力盡鞍甲心思歷涼溫將軍既
下世部曲亦罕存時事一朝異孤績誰復論少壯辭家
去窮老還入門腰鑣刈葵藿倚杖收雞犬昔如韝上鷹
今似檻中猿徒結千載恨空負百年怨棄席思君幄疲
馬戀君軒願垂晉主惠不愧田子魂

虛谷曰此早從軍而晚無成者晉文公捐籩豆棄席
蓐舅犯夜哭出韓子田子方贖老馬事出韓詩外傳

能垂晉主之惠則能不愧於田子之神矣而後世之
不願棄席老馬者衆矣東武地本太山當吟齊之土
風今照用題不拘恐謂東武之人應募亦可詩有筆
力如轉石下千仞山袞袞轟轟不可禦李太白詩甚
似之

出自薊北門行

羽檄起邊亭烽火入咸陽徵騎屯廣武分兵救朔方嚴
秋筋竿勁虜陣精且彊天子按劍怒使者遙相望雁行

緣石徑魚貫度飛梁簫鼓流漢思旌甲被胡霜疾風衝
塞起沙礫自飄揚馬毛縮如蝟角弓不可張時危見臣
節世亂識忠良投軀報明主身死為國殤

虛谷曰此全用楚詞國殤之意身既飛兮神以靈魂
魄毅兮為鬼雄張巡嚼齒穿齦之類是也西京雜記
元封二年大雪深五尺牛馬蹠縮如蝟少陵詩漢時
長安雪一丈牛馬寒毛縮如蝟鮑用又在先也

結客少年場行

驄馬金絡頭錦帶佩吳鉤
失意杯酒間白刃起相讐
追兵一旦至負劍遠行遊
去鄉三十載復得還舊丘
升高臨四關表裏望皇州
九塗平若水雙闕似雲浮
扶宮羅將相夾道列王侯
日中市朝滿車馬若川流
擊鐘陳鼎食方駕自相求
今我獨何為坎壈懷百憂

虛谷曰此謂俠少晚而悔者
朱家郭解之徒終貽悔
吝況區區殺人亡命子乎
可以為戒也此詩專指洛
陽四關者東成皋南伊闕
北孟津西函谷雙闕者南

北宮乃秦始皇所創九塗平若水雙闕似雲浮此亦
古詩蹉對句法

東門行

傷禽惡弦驚倦客惡離聲離聲斷客情賓御皆涕零涕
零心斷絕將去復還訣一息不相知何況異鄉別遙遙
征駕遠杳杳落日晚居人掩閨卧行子夜中飯野風吹
秋木行子心腸斷食梅常苦酸衣葛常苦寒絲竹徒滿
坐憂人不解顏長歌欲自慰彌起長恨端

虛谷曰此專言離別之難詩四折為二韻三韻各二
折味至末句則凡中有憂者雖合樂也而愈悲雖長
歌也而愈怨不特離別也虛弓落鴈事出戰國策更
羸於魏王射者蓋寓言設譬此所謂傷禽惡弦驚也

苦熱行

赤阪橫西阻火山赫南威身熱頭且痛鳥墮魂來歸湯
泉發雲潭焦煙起石圻日月有恒昏雨露未嘗晞丹蛇
踰百尺玄蜂盈十圍含沙射流影吹蠱痛行暉輶氣晝

熏體茵露夜沾衣飢猿不下食晨禽不敢飛毒涇尚多
死渡瀘寧具腓生軀蹈死地昌志登禍機戈船榮既薄
伏波賞亦微財輕君尚惜士重安可希

虛谷曰熱者地之至惡死者事之至難蹈至惡之地
責以至難之事而上之人不察則天下士有去之而
已君視臣如草芥則臣視君如寇讎此詩連以十六
句言苦熱一句用一事富哉言乎毒涇渡瀘始入議
論謂所往之地甚於秦人之毒涇諸葛之渡瀘死地

禍機決無可全之理而軍賞微薄則必失天下之心
矣韓詩外傳田饒對宋燕語財者君所輕死者士所
重君不能用所輕欲使士致重乎

白頭吟

直如朱絲繩清如玉壺冰何慙宿昔意猜恨坐相仍人
情賤恩舊世議逐衰興毫髮一為瑕丘山不可勝食苗
實碩鼠玷白信蒼蠅鳬鵠遠成美薪芻前見陵申黜褒
女進班去趙姬昇周王日淪惑漢帝益嗟稱心賞猶難

全五
卷三
恃貌恭豈易憑古來共如此非君獨撫膺

虛谷曰司馬相如欲聘茂陵女卓文君為白頭吟此
用其題而廣之也沈約宋書古白頭辭曰淒淒重淒
淒嫁女不須啼願得一心人白頭不相離廣其意則
不止夫婦間也此詩可謂道麗俊逸黃鵠所從來遠
而貴之難所從來近而日濡之韓詩外傳田饒語魯
哀公者譬若薪燎後者處上文子語亦汲黯語蓋遠
近前後之說也心賞貌恭一聯至佳至佳

放歌行

蓼蟲避葵堇習苦不見非小人自齷齪安知曠士懷雞
鳴洛城裏禁門平旦開冠蓋縱橫至車騎四方來素帶
曳長飈華纓結遠埃日中安能止鐘鳴猶未歸夷世不
可逢賢君信愛才明慮自天斷不受外嫌猜一言分珪
爵片善辭草萊豈伊白璧賜將起黃金臺今君有何疾
臨路獨遲迴

虛谷曰此詩之意全在夷世不可逢賢君信愛才四

句謂明君在上可以仕矣一言片善可致富貴豈徒
取虞卿之白玉璧又將起郭隗之黃金臺而不急於
仕者果何所病而不進乎起句用蓼蟲避葵藿事楚
辭云蓼蟲不徙乎葵藿言性不遷也世間以苦為甘
以臭為香者固有之然士之處世果逢明君何為不
仕苟有一之未然則不如蓼蟲之安於苦也

升天行

家世宅關輔勝帶宦王城備聞十帝事委曲兩都情倦

見物興衰驟覩俗屯平翻翻類迴掌恍惚似朝榮窮塗
悔短計晚志重長生從師入遠岳結友事僊靈五圖發
金記九籀隱丹經風餐委松宿雲卧恣天行冠霞登綵
閣解玉飲椒庭製遊越萬里近別數千齡鳳臺無還駕
簫管有遺聲何時與爾曹啄腐共吞腥

虛谷曰厭世故而求神仙神仙果有之乎張子房願
從赤松子遊以全功名也梅福去為吳市卒人以為
仙以避亂也未必真有所謂升天者也蘇子由評李

白詩語用兵則先登陷陣不以為難語遊俠則白晝
殺人不以為非予以鮑明遠詩輒續之曰語神仙則
白日升天不以為無若從尾句之意則寓言借喻君
子有高志遠意拔出塵埃之表者視世之卑污苟賤
之人直如禽蟲之吞啄腐腥耳五圖九箴據文選注
引抱朴子五嶽真形圖鄭玄易緯注齊魯間藏器之
管曰箴又以藏經丹有九轉

鼓吹曲

謝玄暉

江南佳麗地金陵帝王州
逶迤帶淶水迢遞起朱樓
飛甍夾馳道垂楊蔭御溝
凝笳翼高蓋疊鼓送華輶
獻納雲臺表功名良可收

虛谷曰文選注奉隋王教作鼓吹歌軍樂也謂之短
簫鐃歌黃帝岐伯所作又古入朝曲吳錄張紘語秣
陵楚武王所置名為金陵秦始皇時望氣者云金陵
有王者氣故斷連岡改名秣陵曹植詩壯哉帝王居

佳麗殊百城玄暉此二句響人牙頰後四句亦熟為人所誦徐引聲謂之凝小擊鼓謂之疊

欽定四庫全書

文選顏鮑謝詩評卷四

元方回撰

雜詩

七月七日夜詠牛女一首

謝惠連

落日隱欄楹
升月照簾櫳
團團滿葉露
析析振條風
蹀足循廣除
瞬目矚曾穹
雲漢有靈匹
彌年闕相從
遐川

阻昵愛修渚曠清容弄杼不成藻聳轡驚前蹤昔離秋
已雨今聚夕無雙傾河易迴幹款顏難久悰沃若靈駕
旋寂寥雲幄空留情顧華寢遙心逐奔龍沈吟為爾感
情深意彌重

虛谷曰世人云七月七日織女嫁牽牛本出齊諧記
謂為桂陽城武丁之言無是理也神仙荒唐予尚未
信况又出於一夫之口誣蔑星象虛無妄誕曰此仙
者之說而世人信之殊可憫也且星之為物固有飛

字流彗之異此徒見有織女之女字撰造夫婦靈配
夜渡天河等事以欺愚俗豈不哀哉玄暉詩推昔離
秋已兩今聚夕無雙為詩宗所稱文選注昔離迄今
會而秋已兩今聚便別故夕無雙也亦注得好他不
過體貼敷衍耳無議論斷此事善乎少陵之詩曰牽
牛出河西織女出河東萬古永相望七夕誰見同神
光竟難候此事終蒙朧是也然猶曰颯然精靈合何
必秋遂通似不謂之全無是理者此少陵力為辨析

謂假使有此精靈脩合何必於秋之七夕耶所以力闢之而非以為有也自祈請走兒童以至日出甘所終既哂夫因節乞巧者之愚自嗟汝未嫁女以至丈夫多英雄又所以訓夫臣之於君猶婦之於夫未有私會苟合而可久者此少陵詩所以獨步也然則牛女之說誨淫之薄俗歟

擣衣詩一首

謝惠連

衡紀無淹度晷運儵如催白露滋園菊秋風落庭槐肅肅莎雞羽烈烈寒螿啼夕陰結空幙宵月皓中閨美人戒裳服端飾相招攜簪玉出北房鳴金步南階擱高砧響發楹長杵聲哀微芳起兩袖輕汗染雙題紈素既已成君子行未歸裁用筭中刀縫為萬里衣盈篋自余手幽絳候君開腰帶準疇昔不知今是非

虛谷曰此詩全在後面八句尤佳則尾句也似當作寄衣以上八句不過賦擣衣而已無佳處又前八句

則述秋夜之景而已斗半夜建者衡北斗中一星也
冬至日月起於牽牛為星紀故曰衡紀無淹度

南樓中望所遲客一首

謝靈運

杳杳日西頽漫漫長路迫登樓為誰思臨江遲來客與
我別所期期在三五夕圓景早已滿佳人猶未適即事
怨睽攜感物方悽戚孟夏非長夜晦明如歲隔瑤華未
堪折蘭苔已屢擿路阻莫贈問云何慰離析搔首訪行

人引領冀良覲

虛谷曰靈運始寧又北轉一汀七里有園南門樓南樓
百許步對橫山在今上虞此遲客之所也遲去聲訓待而文
選注音訓為思非是江淹擬湯休云日暮碧雲合佳人殊未
來不如靈運語意足有來歷初與客期會於月望之夕
今月忽圓而客不至所以為佳淹所謂日暮碧雲合豈
初以黃昏為期乎故曰不如靈運之語意足也

田南樹園激流植援一首

謝靈運

樵隱俱在山由來事不同不同非一事養疴亦園中中
園屏氛雜清曠招遠風卜室倚北阜啓扉面南江激澗
代汲井挿槿當列壙羣木既羅戶衆山亦對牕邈迤趨
下岫迢遞瞰高峯寡欲不期勞即事罕人功唯開蔣生
徑永懷求羊蹤賞心不可忘妙善冀能同

虛谷曰四句喝起有議論臧榮緒晉書胡孔明有言
隱者在山樵者亦在山在山則同所以在山則異靈

運則謂吾樵非隱於中園養病而已此所謂在山同
所以在山者異也無井也以澗代之無墉也以槿當
之羅戶之木對窻之山迤邐則趨下岫迢遞則瞰高
峯謂皆出於自然吾本寡欲而得於勞力即此為田
園之事而功寡矣其以人力為之者唯開三徑以待
賞心之友耳三輔決錄蔣詡字元卿隱於杜陵舍中
三逕惟羊仲求仲從之遊妙善同出郭象莊子注賞
心二字靈運屢用之每篇必然

齋中讀書一首

謝靈運

昔余遊京華未嘗廢丘壑矧乃歸山川心跡雙寂寞
虛館絕諍訟空庭來鳥雀卧疾豐暇豫翰墨時閒作懷抱
觀古今寢食展戲謔既笑沮溺苦又哂子雲閣執戟亦
以疲耕稼豈云樂萬事難並歡達生幸可託

虛谷曰文選注永嘉郡齋也虛館絕諍訟空庭來鳥
雀恐是棄郡事則可予嘗寓永嘉郡齋近時特為殷

盛未易以卧病治也耕稼豈云樂此一句似失言媿
一日郡齋之安而笑夫碌碌朝列之人可也謂勝沮
溺而耕稼亦在所卑過矣

石門新營所住四面高山迴溪石瀨修竹茂林詩

一首

謝靈運

躋險築幽居披雲卧石門苔滑誰能步葛弱豈可捫
嫋秋風過萋萋春草繁美人遊不還佳期何由敷芳塵

凝瑤席清醕滿金樽洞庭空波瀾桂枝徒攀翻結念屬
霄漢孤景莫與諉俯濯石下潭仰看條上援早聞夕飈
急晚見朝日暎崖傾光難留林深響易奔感往慮有復
理來情無存庶特乘日車得以慰營魂匪為衆人說冀
與智者論

虛谷曰詩題止是新築幽居終篇乃屬意所思有美
人不來之歎感往慮有復理來情無存此是說道理
處然老莊之學不可強以吾儒性命道德通之莊子

所謂乘日車郭象亦注不明謂日出而遊日入而息
亦不足多窮也

數詩一首

鮑明遠

一身仕闕西家族滿山東二年從車駕齋祭甘泉宮三
朝國慶畢休沐還舊邦四牡曜長路輕蓋若飛鴻五侯
相餞送高會集新豐六樂陳廣坐組帳揚春風七盤起
長袖庭下列歌鍾八珍盈彫俎綺肴紛錯重九族共瞻

逢賓友仰徽容十載學無就善宦一朝通

虛谷曰此遊戲翰墨如金石絲竹八音建除滿平十二辰角亢氐房二十八宿皆以作難得巧為功非詩之自然者也數者自一至十始云一身仕闕西家族滿山東末至十載學無就善宦一朝通緊要意全在此謂寒士之學十載不成巧宦之人一朝通顯如前九韻所云耳

翫月城西門廨中一首

鮑明遠

始見西南樓，纖纖如玉鉤。
未映東北墀，娟娟似蛾眉。
蛾眉蔽珠櫳，玉鉤隔瑣窻。
三五二八時，千里與君同。
夜移衡漢落，徘徊帷戶中。
歸華先委露，別葉早辭風。
客游厭苦辛，仕子倦飄塵。
休澣自公日，宴慰及私辰。
蜀琴抽白雪，郢曲發陽春。
肴乾酒未缺，金壺啓夕淪。
迴軒駐輕蓋，留酌待情人。

虛谷曰：前六韻言月之自缺而滿，又有感於節物之

易凋文選注華落向本故曰歸華葉下離枝故曰別
葉亦佳後五韻言宦游休幹偶值此月具琴曲設酒
肴當夕漏之云初命駐車以同酌也淪訓波小波曰
淪此詩不似晉後宋人詩

始出尚書省一首

謝玄暉

惟昔逢休明十載朝雲陛既通金閨籍復酌瓊筵醴宸
景厭照臨昏風淪繼體紛虹亂朝日濁河穢清濟防口

猶寬政餐茶更如薺英袞暢人謀文明固天啓青精翼
紫軟黃旗映朱邸還覩司隸章復見東都禮中區咸已
泰輕生諒昭洒趨事辭宮闕載筆陪旌榮邑里向疎蕪
寒流自清泚衰柳尚沈沈凝露方泥泥零落悲友朋歡
虞讌兄弟既秉丹石心寧流素絲涕乘此終蕭散垂竿
深澗底

虛谷曰讀首四句知朏盡齊武帝永明之世立朝十
許年次六句痛鬱林次八句美齊明帝稱曰英袞知

其永帝用青精黃旗并光武司隸事則帝有所歸矣
海陵為虛位也趨事載筆一聯去尚書省為記室也
邑里以下十句乃是因出省而還家眺前賦東田詩
有莊在鍾山蓋有退閒之意也詩排比多而興趣淺
三謝惟靈運詩喜以老莊說道理寫情愫述景則不
冗寄意則極怨為特高云

直中書省一首

謝玄暉

紫殿肅陰陰彤庭赫弘敞風動萬年枝日華承露掌玲瓏結綺錢深沈映朱網紅藥當階翻蒼苔依砌上茲言翔鳳池鳴珮多清響信美非吾室中園思偃仰朋情以鬱陶春物方駘蕩安得凌風翰聊恣山泉賞

虛谷曰眺嘗轉中書郎此紅藥蒼苔之詩應用者資為事料熟矣寔則潘岳懷縣詩有云清泉過庭激綠槐夾門植信美非吾土祇攪懷歸志此全倣之也處省闈而思江湖人能為是言能踐者鮮耳萬年枝今

人以為冬青樹承露盤漢武所為江左宮殿無之殆
借用耳

觀朝雨一首

謝玄暉

朔風吹飛雨蕭條江上來既灑百常觀復集九成臺空
濛如薄霧散漫似輕埃平明振衣坐重門猶未開耳目
暫無擾懷古信悠哉戢翼希驤首乘流畏曝鰓動息無
兼遂岐路多徘徊方同戰勝者去剪北山萊

虛谷曰百常闕出張景陽七命九成臺出呂氏春秋
此必省中早坐見雨有驤首之思又有曝鰓之懼動
而進乎息而退乎恐熊魚難兼而路分為二莫知適
從也如子夏戰紛華而勝則可歸矣亦平

郡內登望一首

謝玄暉

借問下車日匪直望舒圓寒城一以眺平楚正蒼然山
積陵陽阻溪流春穀泉威紆距遙甸巉巖帶遠天切切

陰風暮桑柘起寒煙悵望心已極惆恍魂屢遷結髮倦
為旅平生早事邊誰規鼎食盛寧要狐白鮮方弃汝南
諾言稅遼東田

虛谷曰寒城一以眺平楚正蒼然朱文公極喜此上
一句謂有力唐子西語錄謝玄暉詩平楚猶平野也
呂延濟乃用翹翹錯薪言刈其楚謂楚木叢便覺氣
象殊窘予所有李善本亦爾近世張雪憲良臣詩祇
留平楚伴銷凝予謂乃極目寒蕪之意平野縱無大

草木所以蒼然者蓋亦青青而無極也宣城郡有陵
陽山所謂仙人陵陽子明見劉向列仙傳春穀縣在
丹陽郡出漢書末句汝南諾下棄字佳謂不能為太
守與人畫諾字也遼東田下稅字亦佳牛暴管寧田
寧牽牛飼之亦善用事

和伏武昌登孫權故城一首

謝玄暉

炎靈遺劍璽當塗駭龍戰聖期缺中壤霸功興寓縣鵲

起登吳山鳳翔陵楚甸衿帶窮巖險帷帟盡謀選北拒
溺駢鑣西龕收組練江海既無波俯仰流英盼裴冕類
禋郊卜揆崇離殿釣臺臨講閱樊山開廣譙文物共歲
蕤聲明且蔥蒨三光厭分景書軌欲同薦參差世祀忽
寂漠市朝變舞館識餘基歌梁想遺轉故林衰木平荒
池秋草徧雄圖悵若茲茂宰深遐睠幽客滯江皋從賞
乖纓弁清卮阻獻酬良書限聞見幸藉芳音多承風采
餘絢于役儻有期鄂渚同游衍

虛谷曰炎靈遺斬蛇之劍與傳國之璽而吳興日月
星三光厭乎分景而書軌欲同也故吳亡凡詩述興
盛之事則雅而難為工言及衰亡則哀而易為辭此
舞館歌梁故林荒池四句所以讀之而見其佳也伏
武昌者伏曼容自大司馬參軍出為武昌太守朏以
茂宰稱之太守亦可云茂宰而世人罕用

和王著作八公山詩一首

謝玄暉

二別阻漢抵雙峭望河澳茲嶺復巒岼分區莫淮服東
限琅邪臺西距孟諸陸阡眠起雜樹檀欒蔭修竹日隱
澗疑空雲聚岫如複出沒眺樓雉遠近送春日戎州昔
亂華素景淪伊穀阼危賴宗衮微管寄明牧長蛇固能
剪奔鯨自此曝道峻芳塵流業遙年運條平生仰令圖
吁嗟命不淑浩蕩別親知連翩戒征軸再遠館娃宮兩
去河陽谷風煙四時犯霜雨朝夜沐春秀良已彫秋場
庶能築

虛谷曰此詩平平鋪叙瑯琊孟諸東限西距汎而不
切又誤向背平生仰令圖以下自述兩別家鄉之意
以辛苦為歎殊無足觀檀欒蔭修竹一聯處處可用
何獨八公山

和徐都曹一首

謝玄暉

宛洛佳遨遊春色滿皇州結軫青郊路迴瞰蒼江流日
華川上動風光草際浮桃李成蹊徑桑榆陰道周東都

已俶載言歸望綠疇

虛谷曰文選注和徐都曹勉昧旦出新渚此乃借宛洛以喻建康小詩十句而三句膾炙人口

和王主簿怨情一首

謝玄暉

掖庭聘絕國長門失歡宴相逢詠蘼蕪辭寵悲班扇花叢亂數蝶風簾入雙燕徒使春帶賒坐惜紅粧變生平一顧重宿昔千金賤故人心尚爾故人心不見

虛谷曰花叢亂數蝶風簾入雙燕靈運惠連顏延年
鮑明遠在宋元嘉中未有此等綺麗之作也齊永明
體自沈約立為聲韻之說詩漸以卑而玄暉詩徇俗
太甚太工太巧陰何徐庾繼作遂成唐人律詩而晚
唐尤纖瑣蓋本原於斯一顧重而千金輕此聯乃絕
佳事出列女傳楚成王之夫人鄭子皙初成王登臺
子皙不顧王曰顧吾與汝千金子皙遂行不顧為子
皙之不顧千金彼一時也為王嬙陳后班姬見棄於

主此一時也杜荀鶴風暖鳥聲碎日高花影重之句
全得此格

雜擬

擬魏太子鄴中集詩八首

謝靈運

建安末余時在鄴宮朝遊夕讌究歡愉之極天下良
辰美景賞心樂事四者難并今昆弟友朋二三諸彦
共盡之矣古來此娛書籍未見何者楚襄王時有宋

王唐景梁孝王時有鄒枚嚴馬遊者美矣而其主不
文漢武帝徐樂諸才備應對之能而雄猜多忌豈獲
晤言之適不誣方將庶必賢於今日爾歲月如流零
落將盡撰文懷人感往增愴其辭曰

魏太子

百川赴巨海衆星環北辰照灼爛霄漢遙裔起長津天
地中橫潰家王拯生民區宇既滌蕩羣英必來臻忝此
欽賢性由來常懷仁況值衆君子傾心隆日新論物靡

浮說析理實敷陳羅縷豈闕辭窈窕究天人澄觴滿金
壘連榻設華茵急絃動飛聽清歌拂梁塵何言相遇易
此歡信可珍

王祭

家本秦川貴公子孫遭亂流寓自傷情多

幽厲昔崩亂桓靈今板蕩伊洛既燎煙幽峭沒無像整
裝辭秦川秣馬赴楚壤沮漳自可美客心非外獎常歎
詩人言式微何由往上宰奉皇靈侯伯咸宗長雲騎亂

漢南紀郢皆掃盪排霧屬盛明披雲對清朗慶泰欲重
疊公子特先賞不謂息肩願一旦值明兩並載遊鄴京
方舟汎河廣綢繆清讌娛寂寥梁棟響既作長夜飲豈
顧乘日養

陳琳

袁本初書記之士故述喪亂事多

皇漢逢屯遭天下遭氛慝董氏淪關西袁家擁河北單
民易周章窘身就羈勒豈意事乖已永懷戀故國相公

實勤王信能定螫賊復覩東都輝重見漢朝則餘生幸
已多矧廼值明德愛客不告疲飲讌遺景刻夜聽極星
闌朝遊窮曠黑哀哇動梁埃急觴盪幽默且盡一日娛
莫知古來惑

徐幹

少無宦情有箕穎之心事故仕世多素辭

伊昔家臨淄提攜弄齊瑟置酒飲膠東淹留憩高密此
歡謂可終外物始難畢搖蕩箕濮情窮年迫憂慄末塗

幸休明樓集建薄質已免負薪苦仍游椒蘭室清論事
究萬美話信非一行觴奏悲歌永夜繁白日華屋非蓬
居時髦豈余匹中飲顧昔心悵焉若有失

劉楨

卓犖偏人而文最有氣所得頗經奇

貧居晏里閑少小長東平河充當衝要淪飄薄許京廣
川無逆流招納厠羣英北渡黎陽津南登紀郢城既覽
古今事頗識治亂情歡友相解達敷奏究平生矧荷明

金史卷之七
卷四
哲顧知深覺命輕朝遊牛羊下暮坐枯櫛鳴終歲非一
日傳庖弄新聲辰事既難諧歡願如今并唯羨肅肅翰
續紛戾高冥

應場

汝穎之士流離世故頗有飄薄之歎

噉噉雲中鴈舉翮自委羽求涼弱水湄違寒長沙渚顧
我梁川時緩步集穎許一旦逢世難淪薄恒羈旅天下
昔未定託身早得所官渡厠一卒烏林預艱阻晚節值

衆賢會同庇天宇列坐廕華棖金樽盈清醕始奏延露
曲繼以闌夕語調笑輒酬答嘲謔無慙沮傾軀無遺慮
在心良已叙

阮瑤

管書記之任故有優渥之言

河洲多沙塵風悲黃雲起金羈相馳逐聯翩何窮已慶
雲惠優渥微薄攀多士念昔渤海時南皮戲清汎今復
河曲游鳴笳汎蘭汜躡步陵丹梯竝坐侍君子妍談既

愉心哀弄信睦耳傾醑係芳醕酌言豈終始自從食苹
來唯見今日美

平原侯植

公子不及世事但美遨遊然頗有憂生之嗟

朝遊登鳳閣日暮集華沼傾柯引弱枝攀條摘蕙草徙
倚窮騁望目極盡所討西顧太行山北眺邯鄲道平衢
修且直白楊信裊裊副君命飲宴歡娛寫懷抱良遊匪
晝夜豈云晚與早衆賓悉精妙清辭灑蘭藻哀音下迴

鵲餘哇徹清昊中山不知醉飲德方覺飽願以黃髮期
養生念將老

虛谷曰序擬曹丕作良辰美景賞心樂事四者難并
實靈運語擬為曹丕詩者又云楚襄王時有宋玉
唐景梁孝王時有鄒枚嚴馬游者美矣而其主不文
漢武帝徐樂諸才備應對之能而雄猜多忌豈獲晤
言之適予謂此序使其主宋武帝文帝見之皆必切
齒其主不文明譏劉裕雄猜多忌亦能誅徐傅謝檀

者之所諱也又况言與行皆躁而不靜作為韓亡秦
帝之時宋之禪晉自義熙得柄近二十年而篡文帝
在位至元嘉十年靈運坐誅其創業三十年矣而以
憤辭輕為匡復晉室之語不已疎乎此序亦賈禍之
一端也况文帝以文自命鮑昭悟旨偽作才盡僅僅
自全靈運誠可謂不智矣所擬八篇於曹丕云天地
中橫潰家王拯生民於王粲云排霧屬盛明披雲對
清朗此全是晉宋詩建安無此於陳琳云夜聽極星

關朝廷窮黜黑於徐幹云華屋非蓬居時髦豈余匹
皆不似建安於劉楨云朝遊牛羊下暮坐枯楊鳴枯
楊二字怪詭詩云雞栖于桀牛羊下枯雞棲於桀為
桀桀與楊音義同枯至也似不必如此立異於應瑒
云官渡廁一卒烏林預艱阻頗合實事於阮瑀云河
洲多沙塵風悲黃雲起此兩句頗哀壯於曹植云徙
倚窮騁望目極盡所討西顧太行山北眺邯鄲道此
四句亦高古然他皆規行矩步甃砌粧點而成無可

園點全無所謂建安風調故予評其詩而不書其全篇陳琳徐幹阮瑤三子文選無其詩似不似固難懸斷然建安詩有古詩十九首規格晉人至高莫如阮籍詠懷尚有逕庭靈運山水之作細潤幽怨紆餘開爽則有之矣非建安手也近世有休齋詩話者謂靈運擬鄴中八首無一語可稱誠哉是言今予於八首之中提出其可資話柄者如前亦已怨矣

擬古三首

鮑明遠

幽并重騎射少年好馳逐
羶帶佩雙鞬象弧插彫服獸
肥春草短飛鞚越平陸
朝遊鴈門上暮還樓煩宿
石梁有餘勁驚雀無全目
漢虜方未和邊城屢翻復
留我一白羽將以分虎竹

魯客事楚王懷金襲丹素
既荷主人恩又蒙令尹顧
日晏罷朝歸鞍馬塞衢路
宗黨生光華賓僕遠傾慕
富貴人所欲道德亦何懼
南國有儒生迷方獨淪誤
伐木青

江湄設罝守鳧兔

十五諷詩書篇翰靡不通弱冠參多士飛步游秦宮側
觀君子論預見古人風兩說窮古端五車推筆鋒羞當
白璧貶恥受聊城功晚節從世務乘障遠和戎解佩襲
犀渠卷褰奉盧弓始願力不及安知今所終

虛谷曰此三首亦擬古詩十九首如陸機也第一詩
惟用二事為博宋景公使弓人為弓九年乃成曰臣
之精力盡於此弓景公射之餘力益勁猶飲羽於石

梁出關子吳賀使羿射雀左目誤中右目出帝王世紀
詩意欲以一矢求封侯也第二詩設為魯客之譏富貴
不以道得南國儒生昭以自謂乃獨迷方失位伐木
置兔而守其愚也第三詩謂少年讀書晚節從戎本
非始願不知末路之為如何也然則昭竟有荊州之
歿悲夫

學劉公幹體一首

鮑明遠

胡風吹朔雪千里度龍山集君瑤臺裏飛舞兩楹前茲
辰自為美當避豔陽年豔陽桃李節皎潔不成妍

虛谷曰連龍山出楚詞茲辰自為美一句佳雪之為
物當寒之時則為其美當桃李之時則無所容其皎
潔矣物固各有一時之美也

代君子有所思一首

鮑明遠

西出登雀臺東下望雲闕層閣肅天居馳道直如髮繡

薨結飛霞璇題納行月築山擬蓬壺穿池類溟渤選色
遍齊代徵聲匝邛越陳鐘陪夕讌笙歌待明發年貌不
可還身意會盈歇蟻壤漏山河絲淚毀金骨器惡含滿
歌物忌厚生沒智哉衆多士服理辨昭昧

虛谷曰此詩十韻前述帝居皇闕之盛而後嘆其忽
衰雍門子感孟嘗君之意也築山擬蓬壺穿池類溟
渤選色遍齊代徵聲匝邛越其盛如此蟻壤漏山河
絲淚毀金骨器惡含滿歌物忌厚生沒一朝有不可

測者則衰矣一蟻之孔可以傾山潰河一絲之淚可
以鑠金銷骨歆器滿則覆出家語生之厚而之死地
出莊子詩意本亦常談但造語峭拔而世之富貴驕
淫不戒以顛者比比是也則其言豈可忽諸

